

# LLETRES VIEYES

## *Testos d'El Eco de Covadonga de La Habana*

La revista *El Eco de Covadonga* entamó a asoleyase l'añu 1882, dirixida por Carlos Ciaño y empobinada a l'abundante emigración asturiana de la isla. Revista d'información xeneral al usu, tamién se recoyén nella collaboraciones lliteraries. D'ente elles esbillamos, del número 28 de xunetu de 1883, cinco poemas ensin títulu inxertos na seición de "Cartes al Direutor", tolos cinco dando solución a una de les charaes de Teodoro Cuesta asoleyada nun número anterior. Y del número 72, de 25 d'ochobre de 1884, "Plegaria a la Santísima Virgen de Covadonga", que firma Juan Bautista Ablanedo.

Sr. Director de EL ECO DE COVADONGA.

Como llámome Isidoro  
Que asin que EL Eco coyí  
La charadina llei  
Del paisanin *Te-o-do-ro*.  
Que aquel que l'acierta idan  
Un álbum, diz; lu gané;  
Pos yo bien se l'acerté  
Sin costame mucho afan.  
Cumplir lo que se promete  
Ye de muy buenas usanzas:  
Unvfaime el llibru a Matanzas,  
Gelabert *sesenta y siete*.

*Isidoro García Arias.*

Mayo 30 de 1883.

Cuando les llávenes bailen xiraldilles,  
Y los topos se pongan espejuelos,  
Cuando se cuezan fabes en parrilles,  
Y toquen les campanes sin mayuelos,  
Cuando non haiga cases n'es villes  
*Y se pesquen elefantes con anzuelos,*  
Dexará de valir un mundu d'oro  
El poeta asturiano TEODORO.

Llanera, Mayo 30 de 1883.

*M. Martínez,*

Cuando me puxi á pensar  
La solución de *Teodoro*  
Quixi descifralo todo  
Y al fin la pude sacar.

*Manolo el Polesu.*

M<sup>a</sup> DEL MAR MARTÍN

¡Ay que díaño de charadal!  
¡Dos hores llargues pensando  
Y el cerebru esguedeyando  
Pa non adelantar nada!  
Ente la paré y la espada  
Y hasta en los cuernos d' un toro  
Me meteré, no lo ignoro,  
Pero ó "ansi" no me han llamar  
O yo tengo adivinar  
La charada de *Teodoro*.

*Manuel de Xuan de Fuentes.*

Non se quexe la Maruxa  
Porque sin dote nació;  
Porque 'l encontrar marido  
Todo lo hace la ocasion.

De xente y casa bien farta  
En Otero nací yo,  
Y á la América emigré  
Porque nada nos quedó.

Aunque agora non tien oro,  
Ya lo tendrá, segun creo,  
Cuando vaya de la Habana  
El que llaman Doroteo.

Por muy borricu que sea  
Bueno ye busque muyer,  
Que despues de hacer el *Te*  
Aprenda bien á coser.

Para tener un marido  
Que no conoce la o;  
Vale más estar soltera,  
Y se libra de una coz.

Y aunque se quexa la probe  
Que non la flecha Cupido,  
Nunca faltó en isti mundo,  
Un rotu pa un descosido.

Y para non cansar más  
Voy á deciles el todo,  
Y si mal lo interpreté  
Que perdone Don *Teodoro*.

*Un suscriptor de Cienfuegos.*

31 de Mayo de 1883.

---

## PLEGARIA

A LA SANTISIMA VIRGEN DE COVADONGA.

Estrella luminosa del Auseva,  
Vírxe de Covadonga inmaculada,  
Ilucérn de mió Deva,  
Del pueblu Astur por siempre venerada;

Non me dexes por Dios, madre amorosa,  
Encamina miós pasos hacia' l Cielu,  
¡Amparame en tos brazos bondadosa,  
Que ye triste vivir sin to consuelu!

Flor lo más guapa de mió amada tierra,  
Amparo del q' y duel dalgun quebrantu,  
Ricu caudal d' amor que nunca cierra,  
Sos puertas al que xime y vierte llantu;

Non me dexes por Dios, madre amorosa,  
Encamina miós pasos hacia' l Cielu,  
¡Amparame en tos brazos bondadosa,  
Que ye triste vivir sin to consuelu.

Llágrimas de placer miós güeyos vierten,  
Q' arranquen de mió pochu adoloríu,  
Llágrimes de placer que se convierten  
En tenrures d' amor desconocíu!

Non me dexes por Dios, madre amorosa,  
Encamina miós pasos hacia' l Cielu,  
¡Ampárame en tos brazos bondadosa,  
Que ye triste vivir sin to consuelu!

*Juan B<sup>ta</sup> Ablanedo*

Habana, Setiembre 14 de 1884.

---